

史料旬刊

第十七期

此本草經

卷之二

中華民國十九年十一月十一日出版

史料旬刊第十七期

編輯所 故宮博物院文獻館

發行所 神武門外發售室

印刷所 京華印書局



		表目價		每旬一冊 預定半年 十八冊	每旬一冊 預定全年 三十六冊
費	郵	四	角		
每期一角	埠外	六元五角	十	二	元
每期二角	國外	本院發寄刊 物均交郵局 掛號遞送以 免遺失			

本市 商務印書館 中華書局  
上海 文明書局 世界書局及  
天津 其他各大書店均有代售

史料旬刊第十七期目錄

清咸豐十年英法兵入京焚燬圓明園案 原件藏大高殿

(一) 寶鑾摺

(二) 僧格林沁  
瑞麟摺

(三) 寶鑾摺二

(四) 寶鑾摺三

(五) 英桂摺

(六) 慶昀摺

(七) 奕訢等摺

(八) 僧格林沁摺

(九) 黃贊湯摺

(十) 特普欽那敷德摺

乾隆朝京外王公大臣官員等懇請成造無量壽佛案 原件藏三所

(一) 謂拉遜  
英廉摺

直隸總督李衛奏遵旨覆奏並附陳拿獲匪犯訊出邪教現在辦理緣由摺原

件藏三所

雲南野夷獮獮焚殺搶掠案 原件藏三所

(二)張允隨等摺

(二)張允隨等摺

雲南整欠景海兩土目進貢案 原件藏三所

(一)圖思德摺

(二)圖思德摺二

福建水師提督王郡奏報客民偷渡過臺情形並嚴拿客頭窩引之人治罪摺

原件藏三所

道光朝外洋通商案 原件藏三所

(一)國祥等摺

(二)鍾祥片

(三)陶澍等片

(四) 富呢揚阿片

(五) 奕顥等摺

(六) 陶澍 摺三  
林則徐

福州將軍新柱奏訪訊外番呂宋與蘇祿國彼此搆兵情形摺 原件藏三所

清咸豐十年英法兵入京焚燬圓明園案

寶鑾摺

奴才寶鑾跪奏爲夷匪闖入園庭恭摺奏聞仰祈聖鑒事八月初八日皇上鑾輿起行後總管內務府大臣文豐明善遵旨照料圓明園奴才當即進城籌畫撥解行在餉需辦理防守等事詎意八月二十一日夷匪逼近京城九門戒嚴奴才隨同總統巡守大臣等晝夜在城防護二十二日夜間遙見西北火光燭天奴才等不勝驚駭惟時當深夜恐其乘勢攻城不敢開門往探至二十三日驚聞二十二日酉刻夷匪闖入圓明園奴才等聞信之下曷勝憤恨旋於二十五日夷匪由園退回當卽委派司員前往探聽隨據稟稱園內殿座焚燒數處常嬪業經因驚溘逝總管內務府大臣文豐投入福海殉難等語至總管內務府大臣明善及管理園庭司員等均尙不知下落現仍派員查訪並園內一切詳細情形統俟查明後再行具奏謹將查出大概情形先行奏聞伏乞皇上聖鑑謹奏咸豐十年八月二十八日硃批「知道了」

再查現在總管內務府大臣在京僅奴才一人而圓明園夷匪旣已退回園內

一切皆須清理奴才一人實難兼顧惟有懇乞皇上簡放一二員分任其事以便照料一切謹此附片具奏請旨硃批「現在明善已由行在回園矣所請毋庸議汝係內務府大臣非他人可比即使不能在園料理出城一往有何不可乃竟置之不顧尙有人心耶」

再昨日皇上啓鑾後人心惶惑鋪商歇業甚或匪徒乘間搶劫財物臣等恐滋事端當卽出示曉諭如有匪徒搶劫財物者准該鋪戶格殺勿論倘有軍民搶劫者准其該鋪戶扭稟送官立卽斬首示衆自出示後人心始行稍定嗣後如何另立章程之處應咨行步軍統領衙門妥爲辦理謹奏硃批「知道了」

僧格林沁  
瑞麟摺

奴才僧格林沁奴才瑞麟跪奏爲夷情桀驁撫局未定軍心渙散時勢危迫現擬嚴防北路以遏賊氛恭摺馳奏仰祈聖鑒事竊奴才等於九月初一日承准軍機大臣密寄八月二十八日奉上諭昨據恭親王等奏該夷擾踞園庭撫局不能再議已諭令極力挽回恒祺現在城內著僧格林沁等知照恒祺先行羈

糜吧酋勿令再有決裂聽候恭親王等辦理海淀一帶土匪四起清河地方逃兵匪徒聚集多人在彼搶擄以致文報不通著該大臣迅速查拿懲辦是爲至要等因欽此查喚噶大隊屯紮黑寺一帶經武備院卿恒祺疊次前往夷營設法羈縻該夷口雖言和仍復日增夷兵礮火其中難保不包藏禍心經恒祺屢向婉言始有三日之約至二十九日午刻如不換約定欲攻城該夷把守安定門一節其意甚堅不遵理駁二十八日午後撫局尙未能定時勢已迫經城內王大臣公同商議令恒祺前往夷營告知吧嘎哩於二十九日午刻開安定門使該夷入城以待換約不意該夷是日入城之後携進礮位數尊安放城上雖無搔擾情形居心實屬叵測現在恭親王等於初一日業已由常新店回至西便門外天靈寺住宿尙未進城與該夷會晤撫局是否可成尙難預料倘該夷再有非理要求難保不再行決裂奴才等目賭情形焦急萬分奴才僧格林沁自海口轉戰至今疊經挫敗誤國殃民死有餘辜倘若夷人有變奴才等曷敢不實力兜擊無如現在軍心渙散礮火全無奴才僧格林沁所統步隊屢經失挫潰散十之八九馬隊除陣亡受傷及潰散者現在各處分紮不滿三千奴才

瑞麟所統之兵除調赴守城勝保前統之兵現在所存無幾至新到山東陝甘之兵或紮西便門一帶或紮蘆溝橋以西查其情形即使勉強商調亦恐不足禦敵此時之勢夷人已經把守城門戰守之方無從設措惟有仰托皇上洪福撫局早成方爲妥善伏思聖駕駐蹕熱河北路之防最關緊要奴才等前派署通永鎮總兵海綬將營城所存礮位運往古北口此時諒已可到現在擬派出火器營營總穆騰額已革守備李萬年趕緊馳往古北口將運到礮位妥爲安設以防該營北犯所有海淀清河一帶逃兵匪徒聚集搶擄現在西凌阿帶領馬隊駐紮清河一帶奴才等即咨令該督統就近查拿圓明園一帶已派乾清門侍衛薩克慎等帶領撤回之圓明園八旗外火器營健銳營馬步官兵巡邏搜捕以靖地方所有夷情桀驁撫局尙未議定及嚴防北路各緣由謹恭摺具奏伏乞皇上聖鑒再現在驛站文報時有遲延是以仍派弁賚送密雲交該副都統由六百里馳遞合併聲明謹奏咸豐十年九月初二日硃批「撫局能成與否實難預料所奏情形已悉至新到之兵已有旨全數歸勝保統帶矣」

寶鋆摺二

奴才寶鋆跪奏爲奏聞事八月二十七日由兵部寄到總理行營王大臣恭奉硃諭一道軍機大臣恭奉硃筆一道均交總管內務府大臣文豐明善拆閱等因轉寄前來查文豐業經殉難明善現無下落拆閱無人奴才當即拆封恭讀奉硃諭文豐明善熱河行宮內綏成殿應供奉皇考聖容前於咸豐初年業經恭績現在何處尊藏朕記憶不眞爾等問總管太監徐皂保高進朝在何處尊藏即派委明幹司員請赴行在不必照例豫備或馬上請或用駄轎亦可按站俱在行宮正殿供奉以昭慎重欽此又奉硃筆虎神鎗奇鎗威藝花鎗威藝鎗一對風鎗慎德堂俱交御鎗處送來再迴京取差太監抵園時派儲秀宮首領杜福來永和宮首領張平順景仁宮首領楊吉祥押本宮之物同總管首領太監等一併迅赴熱河其三宮之事著徐皂保等派首領代管欽此奴才遵卽傳知總管太監徐皂保高進朝遵辦去後旋據覆稱熱河應供奉宣宗成皇帝聖容現在乾清宮尊藏奴才隨卽揀派員外郎福瑞繼曾敬謹預備恭送惟日下圓明園夷匪雖退而京北一帶間有土匪乘機搶劫道路未能平靜恭送聖容

至爲慎重擬俟道路肅清即飭該員等設法恭送前往至硃筆傳要虎神鎗等件現因夷匪闖入園庭後此項鎗隻不知是否遺失俟查明卽交御鎗處賚往其傳儲秀宮永和宮景仁宮首領太監押送本宮之物迅赴熱河現已傳知總管太監徐皂保等俟取差太監抵園時欽遵辦理謹此一併奏聞謹奏咸豐十年九月初二日硃批「知道了」

寶鑑摺三

奴才寶鑑跪奏爲禁園被搶印信遺失恭摺奏聞仰祈聖鑒事八月二十五日夷匪退回奴才委員前往查探業將圓明園被焚情形先行奏聞茲於二十八日據清漪園郎中文明稟稱八月二十二日該員挑挖引河在廣源閘見有官兵南退於是日酉刻趕緊回園行至海甸突遇夷人該員繞至六郎莊回園傳知值班官役等妥爲看守二十三日夷人二百餘名並土匪不計其數闖入清漪園東宮門將各殿陳設搶掠大件多有傷損小件盡行搶去並本處印信一併遺失二十四日夷人陸續闖入靜明園宮門將各殿陳設搶掠大件傷損小

件多經搶去其靜宜園夷人並未前往各殿陳設照舊封鎖此三園大概情形  
先行具稟俟將失去陳設清查後再行稟聞正清查間二十七日接大學士瑞  
麟劄文轉傳圓明園八旗健銳營外火器營兵弁即赴圓明園及三山一帶嚴  
密防守搜拿土匪惟清漪園員外郎泰清於二十三日全家自焚殉難等因具  
稟前來奴才接閱之下曷勝憤恨奈奴才現在城內籌辦一切正在吃緊之際  
勢難分身前往查看萬分焦灼惟有嚴飭該員多撥人役妥爲看守並將遺失  
陳設趕緊查明呈覆另行具奏查郎中文明雖因倉猝被搶力未能禦究屬咎  
有應得相應請旨將該園郎中文明交部議處至清漪園印鑰於八月初八日  
皇上啓鑾時經奴才等具奏過交文豐佩帶硃批「因印鑰移交並自請處分尤屬可惡」現在文  
豐殉難此件印鑰尙未查出下落謹此一併奏聞伏乞皇上聖鑑謹奏咸豐十  
年九月初三日硃批「文明著革職留任寶鋆只知顧一己之命前於御園被  
燬旣不前往今於專管之三山亦被搶掠又不前往不知具何肺腸實我滿州  
中之棄物也姑念其城內尙有照料宮庭事件著暫免正法撤去巡防降爲五  
品頂戴一切差使暫停開缺以觀後效

英桂摺

山西巡撫臣英桂跪奏爲恭報微臣交卸起程日期並委署藩臬各篆務仰祈聖鑒事竊臣欽奉上諭夷兵直犯京師勢甚猖獗亟宜厚集兵力以靖逆氛著英桂統帶精兵馳赴京師合力攻剿所有軍火器械餉需均著一律備齊毋得遲延起程之後山西巡撫著常績署理布政使員缺著英桂派員署理等因欽此當即欽遵飛咨大同鎮臣慶德帶領本標官兵二千名臣在省標挑選精兵一千名各赴京城取齊相機剿辦並調平陽營參將珠爾杭阿等兼程來省將各兵分起管帶一面調取馬匹以備應用將大概情形先行馳奏在案茲據帶兵將領先後來省所調營馬二百匹亦經到齊本可星夜趨行適值陝西官兵尙未全出晉境民間車馬不敷周轉已令分作三起行走臣隨後督率前進現將巡撫關防及提督鹽政印信於九月初四日委員送交藩司常績接收署理所有藩司員缺一時派委乏人查有新授臬司瑞昌精明幹練辦事細心堪以署理俟藩篆接手有人再請陛見臬司篆務查有雁平道崇泰勤明謹慎辦事

認眞堪委接署其雁平道一缺查有候補道鍾秀才識兼優辦事精詳堪以遞署臣定於初六日備帶餉需五萬兩星夜起程並刊山西巡撫行營關防滿漢篆文木戳以備鈐用除俟到京後將剿辦情形隨時奏聞外所有微臣交卸起程日期並委署藩臬各篆務緣由理合恭摺由驛具奏伏乞皇上聖鑒謹奏咸豐十年九月初四日硃批「知道了」

再臣正在拜摺間於九月初三日承准軍機大臣字寄八月二十六日奉上諭現在該夷直撲圓明園焚燒街市大肆猖獗著英桂趕緊統帶精兵星夜前來毋得遲延等因欽此臣已先派平陽營參將珠爾杭阿等管帶省標分起前進並咨大同鎮臣慶德由宣化府一帶至近京取齊相機攻勦第恐兵力尙單應再添調太原鎮標官兵五百名派委太原城守尉慶瑞統帶作爲後路應援以資得力而壯聲威理合附片陳明謹奏硃批「另有旨」

再臣前奉上諭現在通州辦理防務所有各標鎮協營中軍械等件著即檢查共有若干迅速解京備用等因欽此當查晉省太原鎮駐紮平陽府自咸豐三年失守以後軍械蕩然嗣雖陸續配造僅數各營兵丁操演之用其大同鎮屬

官兵疊奉調赴他省防剿皆帶軍械隨行間有撤回歸伍而原帶槍礮等件多留軍營備用因此有減無增惟通州防務緊要自應移緩就急先在省標左右太原三營內就其現時操演者湊成擡槍三百桿鳥槍三百桿擡礮五十尊派委文武員弁於本年七月二十四日管解進京聲明其餘鎮協各營尙可撥解若干俟查覆到日另行委解一面由驛奏聞在案茲准太原大同二鎮將所屬各營現存軍械逐件開報爲數皆屬無多且尙有不敷操演之處現在又調大同鎮標官兵二千名均須隨帶軍械更屬無可再撥理合將實在情形附片陳明謹奏硃批「知道了」

再官兵出征例准借給行裝銀兩俟凱旋後仍在該官兵俸餉內分季扣還營馬如有不敷亦應隨時購買以備操演現准部咨以庫欵支絀所有行裝一項應停止給發又馬匹撥解出師將來事竣撤回仍可撥歸原額行令不准買補各等因在部臣固爲節費起見然弁兵率多窮苦遠道從征安家需費添置衣履需費且歷次征調均係借給行裝今若驛行停止不惟該官兵有所藉口更恐相率觀望有誤軍行又如晉省前調太原滿洲營兵二百名因額馬不敷騎

坐暫由綠營湊撥赴通卽大同鎮兵亦因出征者多營馬日少經臣飭司籌款發交鎮臣慶德派弁出口購買甫於本年八月中旬買回五百匹俾此次帶兵赴京得以分撥備用是馬匹旣所必需而行裝尤爲恤兵要欵臣不敢稍事拘泥已飭司照案減半借給俟凱旋坐扣歸補其馬匹一項亦俟事竣覈實報銷以免庫欵懸虛是否有當理合附片陳明伏乞聖鑒謹奏硃批「知道了」

慶昀摺

奴才慶昀跪奏爲遵旨傳知吳廷棟前赴古北口辦理一切並該臬司起程日期恭摺覆奏仰祈聖鑒事竊於九月初一日申刻承准軍機大臣字寄咸豐十年八月二十六日奉上諭朕於本月十六日駐蹕熱河前有旨令恒福迅赴古北口內駐紮督率地方官辦理一切本日據恭親王等奏正議撫局該吏突於二十二日直犯圓明園焚燒街市恒福已到蘆溝橋道阻未能前往請令吳廷棟赴口等語著慶昀傳知吳廷棟即令該臬司由張家口趕緊赴古北口駐紮督辦往來兵差文報各事宜毋稍延緩將此由六百里加緊諭知慶昀並傳諭